

### Cilj svakog učitelja



Danas, 5. oktobra, obilježavamo Svjetski dan učitelja. Biti učitelj, nastavnik, profesor jedno je od najplemenitijih zanimanja. U kojoj god situaciji da je potrebno održati nastavu, naučiti učenike gradivu, ali i međuljudskim odnosima, poštenju, ljubavi i poštovanju prema drugom i dru-


gačijem, iskrenosti, slobodi izražavanja, zauzimanju vlastitog stava i odbrani svog mišljenja, učitelji su se snašli. I snaći će se uvijek, jer to je poziv koji u svom temelju ima ljubav, iako je učenici kad su testovi i ispitivanja, ne uočavaju.

Poziv koji u svom temelju ima cilj i želju da svako dijete bude jednako, pismeno, spremno za dalji život. I prije svega sretno.

Sretan Dan učitelja i nastavnicima i učenicima!

**Pitali smo učenike po čemu pamte svoje učitelje / ice i izašto su im značajni nastavnici. Ovo su njihovi odgovori:**

### Šta su nama učitelji?



"Idućih pedeset godina neće biti važno koji auto vozite, u kakvoj kući živite, koliko novca imate u banci ili kakvu odjeću nosite. No, svijet može biti barem malo bolji jer ste odigrali važnu ulogu u životu djeteta."  
(autor nepoznat)

*Prvih pet godina našeg školovanja proveli smo sa učiteljicom. I to ne običnom učiteljicom, već najboljom učiteljicom,. A reći ću vam zašto je najbolja!*

*Jer nas je naučila da je trud i rad važniji i od ocjene.*

*Jer nas je naučila da nam znanje i samopouzdanje niko ne može oduzeti.*

*Jer nas je naučila da volimo i poštujemo jedni druge,sa svim našim različitostima i da smo zbog tih različitosti posebni. A takva je i ona,zaista posebna i drugačija.*

*U učionicu nam je unosila vedrinu živim bojama njenog modnog stila,i veselim duhom. Uvijek je bila pravedna i išla u korist učenika.*

*Nikad neću zaboraviti naš red za zagrljaje i koliko je svakom od nas u razredu značio. Svakog petka na kraju nastave sa učiteljicom bismo se pozdravili toplim zagrljajem. Tako smo se pozdravili i na kraju petog razreda.*


*Možda se nećemo sjećati svake lekcije koju nas je učiteljica naučila,ali ćemo se zauvijek sjećati koliko smo se posebno sa njom osjećali,i za to Vam učiteljice hvala.*

*Sarah Kadić*



Mnogo volim svoju učiteljicu. Uvijek nosi neobičan nakit i odjeću. Ali njen izgled nije toliko bitan, bitna je njena duša. S njom smo prošli sve lijepe i manje lijepe strane obrazovanja. Uvijek je nastojala da nam lekcije približikroz igru. Testovi i kontrolni zadaci su bili kao vježbica na kraju časa jer nikad nije stvarala pritisak. Često smo poslije škole išli u obilazak znamenitosti Sarajeva. Poredala bi nas kao pačiče i tako bismo krenuli za njom u nova istraživanja.

Esma Dervišević



„Nije znanje znanje znati,  
već je znanje znanje dati.“

„Ne predaje učitelj ono što želi,  
ne predaje učitelj ono što zna,  
učitelj predaje ono što jest.“

Kad poučavamo druge, učimo i sami.

*Prosječan učitelj govori.  
Dobar učitelj objašnjava.  
Izvrstan učitelj pokazuje.  
Vrhunski učitelj inspirira.*

William Arthur Ward

Moja razrednica je vedra i uvijek nasmiješena osoba. Veoma joj je važno da pazimo na sebe i svoje zdravlje, to je bitno za sve nas. Ona voli da među vladaju red i mir, ali nije stroga. Ona je najvažnija osoba u našem razredu i brine se o svima nama.

Aiša Halilović

Od svih učiteljica, meni je moja bila najdraža. Predivna je osoba. Kad bih dobio lošu ocjenu, pozvala bi me na dopunsku nastavu, Kada bi me neko izazivao, ona bi ga kaznila. Često je obilazila biblioteke i knjižare, tako sam zavolio knjige. Učila nas je da budemo obrazovani, pametni i kulturni ljudi kada odrastemo. Neobična i posebna osoba koja će zauvijek imati mjesto u mom srcu.

Dino Demirović



Cilj Svjetskog dana učitelja je osigurati podršku za nastavnike kako bi i dalje ispunjavali potrebe budućih generacija te podigli obrazovanje na nivo društvene važnosti i ali i sami dobili društvenu važnost koju zaslužuju. Ovaj se dan obilježava u više od 100 zemalja svijeta. Proglasio ga je UNESCO godine 1994. u spomen na isti datum 1966. godine kada je potpisana Preporuka o statusu učitelja.

Svjetski dan učitelja treba biti međunarodno priznat i obilježavati se u cijelom svijetu.

Na današnji dan se u našem Kantonu nagrađuju najbolji nastavnici za tu godinu. Ove godine ta je čast pripala dvjema učiteljicama iz naše škole: Slobodanki Okić i Moniki Lika.